

**ԹԻՖԼԻՍԻ ՀԱՅՈՑ ԳՅՈՒՂԱՏՆՏԵՍԱԿԱՆ ԵՎ
ՏՆԱՅՆԱԳՈՐԾԱԿԱՆ ԸՆԿԵՐՈՒԹՅԱՆ ԳՈՐԾՈՒՆԵՈՒԹՅՈՒՆԸ
ԱԼԱՇԿԵՐՏԻ ՀՈՎՏՈՒՄ ԱՌԱՋԻՆ ԱՇԽԱՐՀԱՄԱՐՏԻ ՏԱՐԻՆԵՐԻՆ
(1914-1916 թթ.)**

ՍԱՀԱԿՅԱՆ Ռ. Օ.

Առաջին համաշխարհային պատերազմի տարիներին հայ հասարակութիւնը առջև դրված կարևորագույն հիմնահարցերից մեկը հայ գաղթականության օգնութիւն կազմակերպումն էր: Ռուս-թուրքական (Կովկասյան) ռազմաճակատում մարտական գործողութիւնների սկսվելուց հետո Անդրկովկաս են դալիս առաջին փախստականները՝ հիմնականում սահմանամերձ շրջանների բնակիչներ, որոնք, մտահոգված իրենց և հարազատների անվտանգութեամբ, շտապում էին հեռանալ բնակութիւն վայրերից:

Հայերի, ինչպես նաև հույների ու ռուսների առավել մեծ զանգված գաղթում է 1914 թ. նոյեմբեր-դեկտեմբերին Կարսի նահանգում և Բաթումի մարզում բռնկված՝ աջարների և թուրքերի խռովութիւնից հետո: Ռուսահպատակ քրիստոնյաների, հիմնականում հայերի գույքը թալանվում է, իսկ շատերը սպանվում են: Զրկված գոյութիւն ամենատարրական միջոցներից՝ նրանք հայցում են ռուսական իշխանութիւնների և հայկական բարեգործական կազմակերպութիւնների օգնութիւնը:

Հայ փախստականներին առաջին զգալի օգնութիւնը ցուցաբերում է Կովկասի հայոց բարեգործական ընկերութիւնը: Հայկական կազմակերպութիւնների առավել ծավալուն աշխատանքները սկսվում են այն բանից հետո, երբ ռուսական բանակը դրավում է Ալաշկերտի հովիտը: Հայկական բարեգործական և հասարակական կազմակերպութիւնները, որոնց թվում էր Թիֆլիսի Հայոց գյուղատնտեսական և տնայնագործական ընկերութիւնը (այսուհետև Ընկերութիւն), միջոցներ են ձեռնարկում բնակչութիւն վերադարձն ապահովելու և գյուղատնտեսական աշխատանքները վերսկսելու համար:

Արդեն 1914 թ. նոյեմբերին Ընկերութիւնը սկսում է վերակառուցել իր աշխատանքները՝ նկատի ունենալով նաև Արևմտյան Հայաստանում, մասնավորապես Ալաշկերտի հովտում իր ծավալելիք գործունեութիւնը¹: Կազմակերպութիւնն ուներ 150 անդամ և հրատարակում էր Անդրկովկասի գյուղատնտեսական առաջին պարբերականը՝ «Գյուղատնտեսը»²: Ինքնին հասկանալի է, որ ընկերութիւնը պետք է շարունակեր իր աշխատանքները նաև Արևելյան Հայաստանում և

¹ Հայաստանի ազգային արխիվ (այսուհետև՝ ՀԱԱ), ֆ. 654, ց. 4, գ. 16, թ. 6:

² Նույն տեղում, գ. 9, թ. 13 շրջ.:

Անդրկովկասի հայաբնակ դավառներում: Դա իր հերթին կապահովեր արևմտահայության դյուլատնտեսական օգնության կազմակերպումը երկրագործական գործիքներով, սերմացուով, լծկաններով և անհրաժեշտ այլ պարագաներով: Բացի այդ, Ընկերության վարչությանը հետաքրքրում էր Կովկասի փոխարքայության վարչական տարածքում բնակվող հայ դյուլացիության վիճակը: Նշենք, որ պատերազմի ընթացքում Ընկերությունը և նրա լիազորները համապատասխան ուսումնասիրություններ էին կատարում՝ դյուլացիական տնտեսությունների վիճակը և սպասվելիք բերքի մոտավոր քանակը պարզելու համար: Արդեն 1916 թ. վերջին Ընկերությունն ահագանգում է մոտավորապես սովի մասին, որը Երևանի նահանգում ցանքատարածությունների և ընտանի կենդանիների գլխաքանակի անկման հետևանք էր:

Ընկերությունն ուներ նյութական սահմանափակ հնարավորություններ: 1914 թ. այն ուներ 20700 ռուբլի եկամուտ, որի կեսը՝ 10900-ը, փոխանցում էր Պետերբուրգի Հայոց եկեղեցական խորհուրդը: Երեք հազար ռուբլի տալիս էր Երկրագործական դեպարտամենտը, չորս հազարն էլ անհատների նվիրաբերություններն էին: Մնացած գումարը դոյանում էր անդամավճարներից, «Գյուլատնտես» թերթի վաճառքից և այլ միջոցներից³: Փաստորեն, այլ կազմակերպություններից գումար չստանալու դեպքում Ընկերությունն ի գործ չէր լուրջ օգնություն ցուցաբերել արևմտահայ դյուլացիությանը: Ընդամենը կարող էր երկրագործական աշխատանքները կազմակերպող մասնագետներով ապահովել: Դրա համար անհրաժեշտ էին լրացուցիչ ծախսեր: Ինչպես վկայում են արխիվային վավերագրերը, Առաջին համաշխարհային պատերազմի տարիներին Ընկերությունը դրամական միջոցներ է ստացել հիմնականում Թիֆլիսի Հայոց ազգային բյուրոյից, Կովկասի փոխարքայությունից, ինչպես նաև անհատ անձանց, օրինակ՝ Լևոն Մանթաշյանի նվիրատվություններից:

Պատերազմի սկզբում՝ 1914 թ. հոկտեմբերի 23-ին և դեկտեմբերի 21-ին Կովկասյան բանակի նահանջը Ալաշկերտի և Բասենի հայությանը հարկադրում է երկու անգամ գաղթել⁴: Բացի ճանապարհին կրած զրկանքներից, նրանք ենթարկվում են նաև քրդական հարձակումներին: Առևանգվում են կանայք ու երեխաներ⁵: Ռուսական զորամասերի հետ նրանց պաշտպանությունն իրականացնում էր հայկական Մ խումբը (դրուժինան)⁶: Ալ. Շիրվանզադեի վկայությամբ՝ «Սկսվեց մի գաղթականություն, որի նմանը Շահ-Աբասի օրերն էին միայն տեսել»⁷: Նա նաև հետևյալն է հաղորդում. «Կազակներն ահագին օգնություն էին ցույց տվել կանանց և մանավանդ երեխաներին, տալով նրանց իրենց ձիերը, տաք վերնազգեստները և շատերին կերակրելով: Մի շարք

³ Նույն տեղում:

⁴ Համրավարեր, Թիֆլիս, 19.VI.1916, էջ 775:

⁵ ՀԱԱ, ֆ. 57, ց. 17, գ. 301, թ. 3:

⁶ Նույն տեղում, ֆ. 818, ց. 1, գ. 533, թ. 13:

⁷ Զաքարյան Ա., Շիրվանզադեի հրապարակախոսական ժառանգությունից (1914-1919 թթ.), Ե., 2006, էջ 61:

կազակներ երեք, չորս օր պահել ու կերակրել էին երեսաներին մինչև նրանց ծնողների գտնվելը»⁸:

Ալաշկերտի 24 հազար և Բասենի 20 հազար բնակչությունն ազատվել էր կոտորածից⁹: Ամբողջովին կոտորվում են Զեդկանի, Մուլա-Սուլեյմանի, Խասսուլուրի և այլ գյուղերի, ինչպես նաև Բասենի մի շարք բնակավայրերի բնակիչները¹⁰:

Ռուսական զորքերի կողմից Ալաշկերտի գրավվելուց հետո այնտեղ են գալիս մի խումբ երիտասարդ գործիչներ՝ Ս. Տիգրանյանի գլխավորությամբ: Նախնական ուսումնասիրությունները ցույց են տալիս, որ Ալաշկերտի 23 հայկական գյուղերի մեծ մասը կողոպտվել և քարուքանդ է արվել¹¹: Ինչպես վկայում է Կ. Սասունին, Ս. Տիգրանյանի գլխավորած խումբը «եւ օգնության մարմին էր, եւ կառավարչական դեր կը խաղար (անշուշտ, քողարկուած կերպով), եւ տեղաւորման ու հողային բաշխման գործերը կը կարգաւորէր»¹²:

1914 թ. նոյեմբերի 20-ին Ազգային բյուրոն¹³ Բասեն է ուղարկում վեց հոգուց բաղկացած նոր խումբ, որը կոչվեց «Բասենի քաղաքացիական մարմին»¹⁴: Նրա անդամներն էին Կորյուն Ղազաղյանը, Մինաս Մակարյանը, Տիգրան Ավետիսյանը, Ծատուրը (բժիշկ Բ. Բաղդասարյան), Վահան Խատուտյանը և Կ. Սասունին¹⁵: Ընկերության Ալաշկերտի լիազոր Արշակ Թադևոսյանը նշում է. «Ժողովրդի տնտեսական ապահովությունը, նրա վիճակի բարելավումը ինքն ըստ ինքյան մեծ դրոժ է, բայց նրանից ավելի դնահատելի է այն հեղաշրջումը, որ առաջ է բերված տաճկահայերի (արևմտահայերի — Ս. Ռ.) պես հետամնաց և տաճկական ռեժիմից այլանդակված մեր ժողովրդի մեջ, որի մեջ հաջողվել է մարմնացնել հասարակական սկզբունքները և կարգերը»¹⁶:

Բասենում առաջին հերթին ցուցակագրում են բնակչությանը, կազմակերպում գյուղական նոր վարչություններ: Հաշվառվում և ստուգվում է բասենցիների սակավաթիվ գեները: «Զեռնարկվեցավ պրոպականտի, գյուղական հետամնաց շրջանը քաղաքական եւ ազգային խնդիրներու շուրջ լուսաբանելու համար»¹⁷:

⁸ Նույն տեղում, էջ 68:

⁹ Սասունի Կ., Թրքահայաստանի Ա. աշխարհամարտի ընթացքին (1914-1918). Թրքահայոց զաղթարժերը և անոնց դերը Հայաստանի Հանրապետության կազմավորման մէջ, Պէրոթ, 1966, էջ 40:

¹⁰ ՀԱԱ, ֆ. 28, ց. 1, գ. 132, թ. 36:

¹¹ Նույն տեղում, ֆ. 27, ց. 1, գ. 245, թ. 25 շրջ.:

¹² Սասունի Կ., նշվ. աշխ., էջ 45:

¹³ Գալոյան Գ., Հայաստանը մեծ տերությունների աշխարհակայական առճակատում (XVI դարից-1917թ.), Ե., 2004, էջ 668: 1915 թ. մայիսի 17-ի Կ. Սասունու գեկուցադրից երեւում է, որ նրանց խմբին ուղարկել է Կովկասի հայոց բարեգործական ընկերության (ԿՀԲԸ) Հայկական կենտրոնական կոմիտեն (տե՛ս ՀԱԱ, ֆ. 28, ց. 1, գ. 379, թ. 20): Գործելով Հայկական կենտրոնական կոմիտեի անվան ներքո՝ նրանք թաքցնում էին նաև իրենց գլխավոր խնդիրներից մեկը՝ հայացնել Ալաշկերտի շրջանը՝ օգտվելով այն հանգամանքից, որ քրդերն ու թուրքերը հեռացել են իրենց բնակավայրերից:

¹⁴ ՀԱԱ, ֆ. 28, ց. 1, գ. 379, թ. 20:

¹⁵ Սասունի Կ., նշվ. աշխ., էջ 45-46:

¹⁶ ՀԱԱ, ֆ. 654, ց. 4, գ. 16, թ. 77 շրջ.:

¹⁷ Սասունի Կ., նշվ. աշխ., էջ 48:

1915 թ. հունվարին Գյուղատնտեսականի լիազոր Սահակ Մատինյանը կատարում է Ալաշկերտի, Ղարաքիլիսայի և Դիաղինի շրջանների հայկական բնակավայրերի մոտավոր վիճակագրություն. այն է՝

Ալաշկերտի շրջան

	Բնակավայրի անվանումը	Տների քանակը
1	Զեռական	100
2	Խոշիան	15
3	Մոլլա-Սուլեյման	170
4	Խաստուր	250
5	Զլկանի	100
6	Խաղլո	60
7	Թոփրակ-Վալե	600
8	Ղալաբեկ	70
9	Իրիցու գյուղ	70
10	Էղնիթափա	150
11	Համադ	200
12	Ղարաքիլիսա	35
	Ընդամենը՝	1840

Ղարաքիլիսայի շրջան

	Բնակավայրի անվանումը	Տների քանակը
1	Էրանոս	20
2	Ղարաքիլիսա	400
3	Իրիցու գյուղ	150
4	Էռնդալի	170
5	Ղաղի գյուղ	80
6	Զիրո	12
7	Մանգասար	150
8	Խրգըր	10
9	Զամբլի	8
10	Ղարասու	20
11	Մադրա՝	150
12	Մեկ գյուղ չեմ գրել	
	Ընդամենը՝	1170

Դիաղինի շրջան

	Բնակավայրի անվանումը	Տների քանակը
1	Ղարաբաղար	35
2	Սեյդու	4
3	Շուշան	50
4	Ղուժլի-Բուջալս	40
	Ընդամենը՝	194 ¹⁸

¹⁸ Մեկ գյուղ նշված չէ։

¹⁸ ՀԱԱ, ֆ. 57, ց. 17, գ. 301, թ. 34:

Ս. Մատինյանը կատարում է մոտավոր հաշվարկ՝ հիմք բնդունելով այն հանգամանքը, որ յուրաքանչյուր տանը բնակվել է, միջին հաշվով, տասը հոգի: Դրանից հետևում է, որ Ալաշկերտի շրջանի հայ բնակչության թիվը եղել է 18400, Ղարաքիլիսայինը՝ 11700, Դիրդինինը՝ 1940, իսկ ողջ հայությունը՝ 30 հազար հոգի¹⁹:

Առաջնահերթ խնդիրներից էր գաղթականների բնակեցումը քրդական և թուրքական լքյալ դյուղերում: Դա բացառիկ հնարավորություն էր տալիս թուրք-քրդական բնակավայրերում տեղափոխվելու հայերին: Կ. Սասունու համոզմամբ «Տեղափոխումը կը նշանակեր հայացնել շրջանը»²⁰: Նման խնդիր էր հետապնդում նաև Ընկերությունը կից հիմնված «Հայ դյուղացիությունն տնտեսությունը վերականգնող կոմիտեն»²¹: Սակայն նախատեսված ծրագրերը չի հաջողվում իրականացնել: Ռուսական զորքը, չկարողանալով դիմագրավել թուրքական լայնածավալ հարձակմանը, ստիպված է լինում նահանջել: Ալաշկերտի և Բասենի բնակչությունը ևս հարկադրված էր անցնել Կովկաս²²:

Սարիղամիշի ճակատամարտում (1914 թ. դեկտեմբեր-1915 թ. հունվար) թուրքական 3-րդ բանակի պարտությունը Բասենի և Ալաշկերտի բնակչությանը հնարավորություն է տալիս վերադառնալ հայրենի օջախները: ԿՀԲԸ-ն քայլեր է ձեռնարկում Ալաշկերտ վերադարձող գաղթականների անվտանգությունն ապահովելու համար: Ենթադրվում էր կազմել պահակախումբ, որը բաղկացած էր լինելու հարյուր հոգուց: Կազմվում է նաև նրանց պահելու նախահաշիվը:

Ղարաքիլիսա է գալիս Քաղաքների միություն խումբը՝ Ռոստոմի գլխավորությամբ²³:

1915 թ. մարտին Ընկերությունը Ալաշկերտում հիմնում է իր մասնաճյուղը, որը պետք է դյուղացիներին օժանդակեր կազմակերպելու երկրագործական աշխատանքները²⁴: Սկսած 1915 թ. մարտի 20-ից՝ վերադարձողներին բաժանվում է 14 հազար փութ ցորեն: Նրանք էլ իրենց հերթին հայթայթում են որոշ քանակությամբ ցորեն: Կատարված հաշվարկները ցույց են տալիս, որ առկա ցորենը դյուղացիներին կբավարարի մինչև մայիսի 25-30-ը: Սակայն ոչ բոլորն էին կարողացել լրացուցիչ ցորեն հայթայթել: Մի քանի մարդ սովամահ են լինում²⁵:

Ապրիլի 2-ի հեռագրում Ա. Թադևոսյանը Ընկերության նախագահ Ա. Սահակյանին հայտնում է, որ չորս դյուղերի բաժանվել է հարյուր գլուխ ընտանի կենդանի: Սակայն դա բավարար չէր. անհրաժեշտ էր առնվազն 600 գլուխ լծկան: Գյուղատնտեսական աշխատանքները հնարավոր չի լինում սկսել անձրևների պատճառով: Փախստականների վիճակը ծանր էր: Մանգամթերքի սակավության պատճառով գլուխ էին բարձրացրել

¹⁹ Նույն տեղում, ց. 2, գ. 1313, թ. 6 շրջ.-7:

²⁰ Սասունի Կ., նշվ. աշխ., էջ 49:

²¹ ՀԱԱ, ֆ. 28, ց. 1, գ. 379, թ. 33:

²² Նույն տեղում, թ. 21:

²³ Տե՛ս Գաղափար, 24.11.1916:

²⁴ ՀԱԱ, ֆ. 654, ց. 4, գ. 16, թ. 42:

²⁵ Նույն տեղում, ֆ. 28, ց. 1, գ. 379, թ. 24:

տարբեր հիմանդրություններ: Անհրաժեշտ էր շտապ ուղարկել բուժօգնություն²⁶:

Մայիսի 24-ին Մանագկերտ են ժամանում Ընկերության ներկայացուցիչները: Նրանց մեջ էր հայ մեծ բանաստեղծ Հովհաննես Թումանյանի որդին՝ Մուշեղը: Մայիսի 26-ին Ընկերության Ալաշկերտի լիազոր Արշակ Թադևոսյանին ուղղված նամակում Մուշեղ Թումանյանը հայտնում է. «Տիֆ հիմանդրությունը սարսափելի չափերի է հասել՝ չենք կարող մի հիվանդանոց հիմնել, վասն զի անհնար է 100-200 հիվանդների համար տեղ գտնել և, որ ամենագլխավորն է՝ խնամել»²⁷: Այդ նպատակով անհրաժեշտ էր սանիտարական ջոկատ ուղարկել Ալաշկերտ-Ղարաքիլիսա:

Մ. Թումանյանը վկայում է, որ իրենց զգալի օգնություն են ցույց տալիս չըջանում տեղակայված դիֆիզիայի հրամանատար, գեներալ Ն. Վորոպանովը, Մանագկերտի զինվորական պարետ, ենթասպա Ուշկովը: Մ. Թումանյանը վերջինիս բնութագրում է որպես «մի աննման մարդ»: Նա հետևյալն է գրում. «սրանք են (վերոնշյալ ուղևորները — Մ. Թ.) ստեղծում էլ լավը՝ կազմակերպել են տեղական ոստիկանություն, աշխատում են գյուղացիներին դյուրություն տալ: Վորոպանովը երբ իմացել էր, որ բժիշկն ու ես եկել ենք, ակնարկել էր, որ լավ կը լինեք, որ մենք այցելեինք իրան»: Գեներալը պատրաստակամություն է հայտնում աջակցել դաղթականությանը վերաբերող ցանկացած հարցին²⁸:

Աշխատանքներ են տարվում լքված դյուղերի հորերում թաքցրված ցորենը գտնելու համար²⁹: Գտնված ցորենի կեսը տրվում էր բնակիչներին, իսկ մնացածը կենտրոնացվում էր պահեստներում՝ բնակչությանը բաժանելու համար: Ազգային մարմինը միաժամանակ գնում էր ցորենը փութը մեկ ուղբով: Նշված աշխատանքների շնորհիվ 1915 թ. ապրիլին կուտակվում է մոտ 60 հազար կոտ ցորեն և գարի³⁰: Գյուղացիներից հավաքած ցորենը կուտակվում էր հատուկ պահեստներում, որոնք կոչվում էին Ազգային ամբարներ³¹:

Մ. Թումանյանի հաղորդման համաձայն, կազմվում են երեք հանձնաժողովներ՝ աշխատանքային խմբեր: Առաջինը պետք է կապ պահպանվեր տեղական իշխանությունների հետ, երկրորդը՝ բժիշկների: Նա պետք է բուժօգնություն ցույց տար հիվանդներին, հետեվեր փողոցների և տների սանիտարահիգիենիկ մաքրությունը: Երրորդ խումբը, որը գլխավորելու էր Մ. Թումանյանը, զբաղվելու էր «զուտ փախստականական գործով, տնտեսական, բնակարանային, հագուստի և այլն, մի խոսքով այն

²⁶ Նույն տեղում, ֆ. 654, ց. 4, գ. 16, թ. 152:

²⁷ Նույն տեղում, թ. 14: Մ. Թումանյանն ինքն էլ է հիվանդանում և ստիպված է լինում ժամանակավորապես զաղարեցնել իր գործունեությունը: Ապաքինվելուց հետո նա պատրաստակամություն է հայտնում վերադառնալ Ալաշկերտ և շարունակել աշխատանքները (տե՛ս Նույն տեղում, թ. 29, 33): Մ. Թումանյանի հաշվետվությունը տե՛ս Սահակյան Ռ. Օ., Մուշեղ Թումանյանի 1915 թ. մայիսի 26-ի նամակ-գեկուցագիրը Ալաշկերտի հայության վիճակի մասին (Վէմ, 2009, N 3, հոկտեմբեր-նոյեմբեր, էջ 186-190):

²⁸ ՀԱԱ. ֆ. 654, ց. 4, գ. 16, թ. 15 շրջ.:

²⁹ Նույն տեղում, թ. 16 շրջ.:

³⁰ Սասունի Կ., նշվ. աշխ., էջ 65-66:

³¹ ՀԱԱ, ֆ. 28, ց. 1, գ. 379, թ. 23:

բոլորով ինչ որ չի մտնում վերը յիշած երկու յանձնաժողովների գործունեությանն սահմանը»։ Նրա խմբի անդամներն էին Համադասակ վարդապետը, տեր-Հովհաննես քահանան, Առաքելը, Մխիթարը՝ թվով 10-15 «ինտելիգենտ անձնավորություններ»³²։

1915 թ. հունիսի 1-ից սկսում է գործել երեք հոգուց կազմված՝ «Բասենի քաղաքացիական խումբը», որի անդամներն էին Արտաշես Ասլանյանը, Սամսոն Հովհաննիսյանը և Միքայել Նանիկյանը³³։ Նրանք առաջին հերթին հաշվառում են Բասենում բնակվող գաղթականներին, որոնք մոտավոր հաշվումներով 844 ընտանիք էին կամ 6235 հոգի³⁴։ Խմբի կարծիքով, «...այդ թիվն անշուշտ ավելի բարձրանալու է և թերևս արդեն իսկ բարձրացած էլ լինի, որովհետև Կովկասից, մանավանդ Ղարսի շրջանից, շատերն են գալիս մեր կողմերը, որտեղ նրանց համար համեմատաբար դյուրին է ապրել»³⁵։

1915 թ. հունիսի 4-ին «Հայ գյուղացիության տնտեսությունը վերականգնող կոմիտեի» լիազոր Արշակ Թադևոսյանը Ընկերության նախագահ Ա. Սահակյանին հայտնում է, որ ռազմաճակատի մոտիկությունը շատերի մեջ այն կարծիքն է ձևավորել, որ փախստականների վերադարձը «այս տարվա ընթացքում անհնարին է, վտանգավոր է և հետևապես՝ ոչ ցանկալի»³⁶։

Ալաշկերտի շրջանում հնարավոր է լինում ցանել մոտ 2700 սոմար (մեկ սոմարը մոտավորապես 7,5 փուլ է), իսկ Ղարաքիլիսայի շրջանում՝ 1300 սոմար ցորեն։ Բացի այդ, բնակչությունը կարողացել էր հայտնաբերել քրդերի թաքցրած ցորենը, օգտագործել սեփական կարիքների համար և նույնիսկ մի մասը վաճառել շրջանում տեղակայված ռուսական զորամասերին։ Ենթադրվում էր, որ ցորենի բերքը կատացվեր մեկը ութի հարաբերությամբ։ Ըստ Ա. Թադևոսյանի, դա հնարավորություն կտար բնակչությանը մեկ տարի ապահովել հացով³⁷։

Հուլիսին Ընկերության ուղարկած 400 դերանդին նույնպես բաժանում են բնակչությանը։ Համատեղ ուժերով կատարվում է խոտահարքը։ Հնձած խոտը տրվում է գյուղացիներին՝ հաշվի առնելով տնային կենդանիների թվաքանակը՝ կենդանիներին ապահովելով ձմեռային կերով³⁸։

Օգոստոսի կեսերից ռուսական հրամանատարությունը նախաձեռնում է Մժնկերտ-Ղարաքիլիսա-Ալիջազրակ խճուղային ճանապարհի շինարարությունը և բանակի համար կացարանների կառուցումը։ Տեղի բնակչությունը մասնակցում է շինարարական աշխատանքներին և լրացուցիչ գումար վաստակում³⁹։

³² Նույն տեղում, ֆ. 654, ց. 4, դ. 16, թ. 14 շրջ.։

³³ Գյուղատնտես, Թիֆլիս, N 2, 1.II.1916, էջ 26։ Կազմակերպությունը կոչվել է նաև «Բասենի քաղաքացիական մարմին» (տե՛ս ՀԱԱ, ֆ. 654, ց. 4, դ. 11, թ. 5)։

³⁴ Գյուղատնտես, N 2, 1.II.1916, էջ 28։

³⁵ Նույն տեղում։

³⁶ ՀԱԱ, ֆ. 654, ց. 4, դ. 16, թ. 75։

³⁷ Նույն տեղում, ֆ. 27, ց. 1, դ. 245, թ. 7 շրջ.։

³⁸ Գյուղատնտես, N 2, 1.II.1916, էջ 28։ Ալաշկերտի բնակչությանը տրվել էին 436 դուլթան, 140 դերանդի, 215 եղան, 115 բաճ, 44 կացին և այլն (տե՛ս ՀԱԱ, ֆ. 654, ց. 4, դ. 16, թ. 43 և շրջ.։)

³⁹ Գյուղատնտես, N 2, 1.II.1916, էջ 28։

Արչակ Թադևոսյանի կազմած նախահաշվի համաձայն, Ալաշկերտի հովտում գյուղատնտեսական աշխատանքները կազմակերպելու համար անհրաժեշտ էր 121 հազար ռուբլի: Նա գնել ու գյուղացիներին է բաժանել 170 լծկան և մոտ հազար ռուբլու սերմացու⁴⁰:

Մ. Թումանյանի վկայությամբ, տեղական իշխանությունների հետ հաստատվում են բարեկամական-չեզոք հարաբերություններ: Նրանք չէին խառնվում հայկական խմբերի գործողություններին. «մինչև հիմա մեզանից ոչ ոք ոչ մի թուղթ, չի պահանջե, կարծես թե մարդիկ արդեն հաշտվել են այն մտքի հետ, որ ոչ մի կերպ մեզանից չեն ազատվելու և սուսուկիում մի *modus vivendi* (ժամանակավոր համաձայնություն - Մ. Թ.) է ստեղծվում, ըստ երևույթին՝ մեզ համար բավական տանելի»⁴¹: Ընդհանրապես հայ գաղթականության համար կարևոր նշանակություն է ունենում 1915 թ. օգոստոսի 30-ին ռուսական կառավարության ընդունած որոշումը, որով հայ փախստականները կարող էին օգտվել պետական նպաստներից: Անաշխատունակներին տրվում էին օրական 15 կոպեկ նպաստ և պարեն⁴²:

Դեկտեմբերի 23-ին Մակուի խանություն է գործուղվում Ալաշկերտում Ընկերության լիազոր Բաղդասար Աբոյանը: Նրան հանձնարարված էր Մակուի խանությունում գնել և Ալաշկերտ տեղափոխել մինչև 50 հազար փութ ցորեն: Ներկրելու վերաբերյալ ստացվում է Կովկասյան 4-րդ բանակային կորպուսի հրամանատար գեներալ Պ. Օզանովսկու թույլտվությունը: Վերոհիշյալ ցորենից նախատեսվում է 25-30 հազարը բաժանել գյուղացիներին, իսկ մնացած 20 հազարը պահել որպես սերմացու: Նույն ժամանակաշրջանում հայտնի է դառնում, որ մեծահարուստ և բարերար Ալեքսանդր Մանթաշյանի որդին՝ Լևոնը, 600 հազար ռուբլի է նվիրաբերում «հայ ժողովրդի գյուղատնտեսական-կրթական կարիքների համար»: Նա միաժամանակ նախատեսել է զարգացնել գտարյուն ձիերի բուծումը: Նշված աշխատանքը հանձնարարվել է Ընկերությանը⁴³:

Ռուսական իշխանություններից հաջողվում է ստանալ տաք հագուստ և ալյուր: Ընկերությունն ինքը պետք է հոգար բեռների տեղափոխումը էջմիածնից Ղարաբախ: Այդ մասին հայտնելով Ընկերության նախագահ Ա. Սահակյանին՝ նույն Ընկերության աշխատակից Բ. Աբոյանը խորհուրդ է տալիս ձիերի և սալերի համար դիմել Նրևանում գտնվող Դրոյին⁴⁴:

Փետրվարի 20-ին Բասենի քաղաքացիական կոմիտեի անդամ Միքայել Նանիկյանը Ա. Սահակյանին ուղղած նամակում հայտնում է, որ կոմիտեն երկու ամիս շարունակ զբաղված է եղել Բասենի բնակչության և գույքի վիճակագրությամբ: Ուսումնասիրությունները ցույց են տալիս, որ թուրքական Բասենի 19 գյուղում բնակվում էին մոտ վեց հազար հոգի: Գյուղերն ունեին 6920 ղեսյատին հերկած և 1740 ղեսյատին չհերկած հող: Գարնանացանի համար անհրաժեշտ էր 1100 արոր, իսկ

⁴⁰ ՀԱԱ, ֆ. 27, ց. 1, գ. 245, թ. 7 չրթ.:

⁴¹ Նույն տեղում, ֆ. 654, ց. 4, գ. 16, թ. 15 չրթ.-16:

⁴² Նույն տեղում, ֆ. 28, ց. 1, գ. 132, թ. 39:

⁴³ Գյուղատնտես, 15.1.1916, էջ 13:

⁴⁴ ՀԱԱ, ֆ. 654, ց. 4, գ. 16, թ. 182:

գյուղացիներն ունեին 300-ը: Եղեբերի գլխաքանակը հնարավոր չի լինում ճշտել, քանի որ դրանց մի մասը սատկել էր, իսկ մի մասն էլ գյուղացիները վաճառել էին, որովհետև գտնվում էին ծանր վիճակում: Մինչդեռ վերոնշյալ հողատարածությունները ցանկելու կամ վարելու համար հարկավոր էր 1500 լծկան⁴⁵:

Փետրվարի 28-ին Մ. Նանիկյանը Ա. Սահակյանին գրած նամակում տաղնապով հայտնում է, որ եղանակներն անսովոր տաք են, և դարնանացանն ավելի շուտ է սկսվելու: Այդ իսկ պատճառով, «գյուղացիք արդեն սկսել են անհանգստանալ դարնանացանի համար, և ամեն օր դիմում են մեզ հարցնելով՝ արդյոք պիտի ստանա՞ն սերմացու և ե՞րբ»⁴⁶:

Ղարաքիլիսա-Ալաշկերտ շրջանի բնակչությանն օգնելու և տեղում նրա նվազագույն կարիքները բավարարելու համար կարևոր էր Ընկերության Ալաշկերտի լիազոր Ն. Օթարյանին էջմիածնի «Նղբայրական օգնությունից» արված 20 հազար ռուբլին: Գումարը նախատեսված էր Ալաշկերտի, Բայազետի և Դիադինի գյուղական բնակչությանը երկրագործական գործիքներով ապահովելու համար: Իսկ Դիադինի շրջանի կառավարիչ բարոն Սոփենը ռուսական իշխանությունների անունից հանձնում է 11500 ռուբլի Դիադինի շրջանի գյուղացիների համար սերմացու գնելու⁴⁷:

1916 թ. ապրիլին Ղարաքիլիսայում բացվում է հիվանդանոց, որի ֆինանսավորումն իրականացնում է Ամերիկահայ բժշկական հանձնաժողովը: Վերջինս Ղարաքիլիսա է դործուղում բժիշկ Քրեսին: Նա պետք է Ալաշկերտում հիմներ հիվանդանոց: Նյու Յորքից ժամանում է բժիշկ Վիլյամ Հարդվելը, որն իր հետ բերել էր հինգ արկղ դեղորայք՝ Ղարաքիլիսայում հիմնվելիք հիվանդանոցի համար⁴⁸:

Իր հերթին, «Հայ գյուղացիության տնտեսությունը վերականգնող կոմիտեն», որի հիմնական պարտականությունն էր տեղում գյուղատնտեսական աշխատանքների կազմակերպումը, նկատի ունենալով, որ բնակչության շրջանում տարածված հիվանդությունների հետևանքով կարող են ձախողվել հողագործական աշխատանքները, քայլեր է ձեռնարկում 20 մահճակալանոց հիվանդանոց բացելու համար: Ինչպես նշում է Ընկերության լիազոր Ա. Թադևոսյանը. «Եթե վաղօրոք միջոցներ ձեռք չառնվեին, կանանց և երեխաների վերադարձով ճարակը կարող էր ընդունել ահեղի չափեր»⁴⁹:

Բացի Ընկերության «Հայ գյուղացիության տնտեսությունը վերականգնող կոմիտեից», Ալաշկերտ-Ղարաքիլիսայի շրջանում գործում էին «Հայկական կենտրոնական կոմիտեն», էջմիածնի «Նղբայրական օգնության հանձնաժողովը», որոնք բավական աշխատանքներ են կատարում փախստականների վերաբնակեցումը կազմակերպելու համար: Ընկերության կարծիքով, նրանք իրենց հիմնական ջանքերը պետք է կենտրոնացնեն բնակիչներին կացարաններով ապահովելու

⁴⁵ Նույն տեղում, գ. 14, թ. 1 և շրջ.:

⁴⁶ Նույն տեղում, թ. 3 շրջ.:

⁴⁷ Գյուղատնտես, N 3, 15.II.1916, էջ 47:

⁴⁸ Համրավարեր, N 17, 24.IV.1916, էջ 531:

⁴⁹ Գյուղատնտես, N 1, 15.I.1916, էջ 5:

ուղղությամբ⁵⁰: Ռուս-թուրքական ռազմաճակատի որոշ կայունացումը փախստականներին հնարավորություն է տալիս վերադառնալ և վերականգնել ավերված տները և ձեռնարկել գյուղատնտեսական աշխատանքների: Ալաշկերտ են գալիս հիմնականում տղամարդիկ, որոնց թիվը հասնում էր վեց հազարի⁵¹: Կանայք ու երեխաները մնում են Կովկասում: Պիտի վերադառնալին այն ժամանակ, երբ հնարավոր կլիներ նրանց ապահովել պարենով և տնով: Վերադարձողները բնակվում են 25 գյուղերում, որոնց մեծ մասը ավերակ վիճակում էր: Այնուամենայնիվ, գյուղացիները ձեռնամուխ են լինում երկրագործական աշխատանքներին: Նրանք ցանում են մոտ 400 հազար փութ հացահատիկ:

Աշխատանքները կատարվում էին խիստ աննպաստ պայմաններում: Լծկանների զգալի մասը հյուծված էր, պակասում էր կերը, բնակչության շրջանում տարածված էին տարափոխիկ հիվանդություններ, գլխավորապես տիֆ, չկային կեցության համար նվազագույն պայմաններ⁵²:

Քնկերության Ալաշկերտի լիազորի պաշտոնակատար Հ. Չոլախյանը հայտնում է, որ 1916 թ. օգոստոսի 23-24-ը Մուշից և Խնուսից եկել են 315 հոգի: Մոտ 300 հոգի էլ Ալաշկերտի գյուղերից վերադարձել են Մանազկերտ, Դառվան և «մասամբ էլ ավելի առաջ՝ դեպի Բիթլիս»⁵³:

Աչնայն, սակայն, Բասենի շրջանում ստեղծվում է ծայրահեղ ծանր վիճակ: Բնակչությանը սպառնում էր սովը: Այդ մասին ահազանգում է Քաղաքների միության էքզերումի փախստականների սննդակայանի գլխավոր կառավարիչ Ս. Օհանջանյանը: Ս. Հարությունյանին ուղղած նամակում նա հայտնում է. «Յորեն կամ այիոր թոթորովին չկա (ընդգծումը՝

փաստաթղթից - Ս. Ռ.): ...Շրջանիս գաղթականության կարող անհատը, դրամը ձեռքին, անկարող է լինում մի բուռն անգամ ալյուր ձեռք բերելու: Էլ չենք խոսում անկարող և նյութական միջոցներից զուրկ որբերի և այրիների մասին»⁵⁴:

Գաղթականների կատարած հաշվարկի համաձայն, յուրաքանչյուրին օրական անհրաժեշտ էր երկու ֆունտ ալյուր, որը 12 հազար գաղթականի համար կկազմեր օրական 600, իսկ ամսական՝ 1800 փութ ալյուր: ԿՀԲԸ-ի՝ Բաշգյուղում գտնվող սննդամթերքի պահեստից կարողանում էին օգտվել նրանք, ովքեր դրամ ունեին և գյուղին մոտ էին ապրում: Առավել դժվար էր այն գյուղացիների վիճակը, որոնք բնակվում էին պահեստից մոտ հարյուր վերստ հեռավորության վրա: Նրանց մի մասը զուրկ էր դրամական որևէ միջոցից և այդ իսկ պատճառով չէր կարող օգտվել Բարեգործականի պահեստից⁵⁵:

Քնկերությունը դիմում է Ս. Էջմիածնի «Եղբայրական օգնության հանձնաժողովին»՝ խնդրելով օժանդակել Ալաշկերտի խնամուրթ և Թուր-

⁵⁰ Նույն տեղում, էջ 4:

⁵¹ Ըստ «Հայ գյուղացիության տնտեսությունը վերականգնող կոմիտեի» Իգդիրի աշխատակցի վիճակագրության, 1915 թ. մայիսի դրությամբ Ալաշկերտ-Ղարաքիլիսայի շրջան են վերադարձել 1800 հոգի, որոնք «ներկայացուցիչ են մոտ 1200 և 1500 րնտանիքների» (տե՛ս ՀԱԱ, ֆ. 28, ց. 1, գ. 379, թ. 33):

⁵² Նույն տեղում:

⁵³ Նույն տեղում, ֆ. 654, ց. 4, գ. 16, թ. 49:

⁵⁴ Նույն տեղում, ց. 1, գ. 582, թ. 1:

⁵⁵ Նույն տեղում, թ. 5:

րակ-կալե գյուղերում բացվող դպրոցներին, սակայն հանձնաժողովի ուսումնական խորհուրդը մերժում է պատճառաբանելով, որ նշված վայրերը չեն մտնում իր գործունեության շրջանակի մեջ⁵⁶:

1916 թ. վերջից Բասեն են գալիս Արևելյան Հայաստանի տարբեր բնակավայրերում ապաստանածներ, թվով՝ 5 հազար հոգի: Վերադառնում են նաև տարբեր ժամանակներում թուրքական իշխանութ-յունների վարած քաղաքականության հետևանքով իրենց օջախները լքած բասենցիները: Վերադարձողները բնակություն են հաստատում ինչպես իրենց, այնպես էլ լքյալ բնակավայրերում: Ա. Հարությունյանի հաշվարկի համաձայն, Բասենի շրջանում կային 2 հազար տուն դադթական, թվով՝ 11290 հոգի⁵⁷: Աստիճանաբար ավելանում են բնակիչ-ները: 1917 թ. հուլիսին նրանց թիվը 15 հազար էր⁵⁸:

Իրավիճակը փոքր-ինչ կարգավորվելուց հետո, Ընկերությունը նախատեսում է Ալաշկերտում հիմնել գյուղատնտեսական վարժարան, որն ունենալու էր երկու դասարան: Վարժարանը հիմնելու համար անհրաժեշտ էր 14750 ուրլի⁵⁹: Սակայն հետագա իրադարձությունները հնարավորություն չեն տալիս ավարտել Ալաշկերտի և շրջանի հայության վերադարձի ու վերաշինության հետ կապված աշխատանքները:

**ДЕЯТЕЛЬНОСТЬ ТИФЛИССКОГО АРМЯНСКОГО СЕЛЬСКОХОЗЯЙСТВЕННОГО
И КУСТАРНОГО ОБЩЕСТВА В АЛАШКЕРТСКОЙ ДОЛИНЕ В ГОДЫ ПЕРВОЙ
МИРОВОЙ ВОЙНЫ
(1914-1916 гг.)**

СААКЯН Р. О.

Резюме

Тифлисское Армянское сельскохозяйственное и кустарное общество было основано в 1909 г. и имело целью помочь армянским крестьянам в организации ремесел и сельскохозяйственных работ. Начиная с 25 января 1909 г. общество стало издавать специализированное издание "Гюхатнтес" ("Агроном"). Общество развернуло деятельность во время Первой мировой войны в Западной Армении, на освобожденной от турецких войск территории — в Алашкертской долине (1915-1916 гг.). Уполномоченные и члены общества работали в исключительно тяжелых условиях.

⁵⁶ Նույն տեղում, գ. 304, թ. 7:

⁵⁷ Հարությունյան Ա. Հ., Հայ գաղթականության տեղարաշխուժը և օգնության կազմակերպումը Արևմտյան Հայաստանի գրավված շրջաններում Մեծ եղեռնի տարիներին, Էջմիածին, N 7, 2007, էջ 67:

⁵⁸ Նույն տեղում, էջ 68:

⁵⁹ ՀԱԱ, ֆ. 654, ց. 4, գ. 16, թ. 104:

Это был период отступления русских войск, что пагубно отразилось на деятельности не только сельскохозяйственного общества, но и армян, которые вынуждены были покинуть свои жилища и отступить с русскими войсками. Несмотря на все сложности и значительные финансовые потери, общество продолжало помогать крестьянам, которые возвращались в свои деревни. После того как русские войска 3 февраля 1916 г. заняли крепость Эрзерум, в Алашкертскую долину стало возвращаться больше армян. Сын армянского нефтепромышленника и благотворителя Александра Манташяна — Лсвон пожертвовал крупную сумму — 600 тыс. рублей на открытие в Алашкертской долине сельскохозяйственной школы и конного завода. Однако последующие события помешали претворению в жизнь всех намеченных работ.